

â ndiesija e shpagimit, prirja e gjak-marrjes, duhet t'a shrrânjosim prej shpirtit të kalamâjve, pse dâmton kombin e po faron fiset malsore. Duhet qyshë në vogjli t'u a mbushim menden, t'u a ngulim në zëmër se â një turp, një barbarizëm. Kaqë sa qi...

Doda nisi m'u nxë si të kish përpara një kundrështar të padukshëm. Pa pritë zâni i u egërsue, Vajza çoi vetullat, e çuditun, dhe e shikoi më sa ai po vijonte:

— ... për me kallzue prapsin t'onë, të huejt e qesin gjakmarrjen si provë kryesore.

Mëni. Heshti dy çasa, mbandej shtoi, i qetuem:

— Prirjen e gjakmarrjes duhet m'e bâ të zhduket prej shpirtnave të njomë, më sa qi ato të besës, të burrnis, të mikpritjes etj. lypet me i forcue tue u dhânë një drejtim të mbarë, sepse shpesh edhe këto cilsî të mira Shqiptari i vên në shërbim të një qëllimi të mbrapësht.

Vajza pyeti:

— Ça do me bâ ti për me i a shkulë rrânjët të parave e me zhdrivillue të dytat?

— Ça bân mâ tepër përshtypje në trût e njoma të foshnjevet, në vjetët e para të shkollës? Libri i lexi-mit; asë? Pra un kam qitë cekën me përpilue një libër leximi, pesë vëllimesh — aqë sa janë klasët e shkollës fillore, — ku metodikisht, me tregime të gjalla, do t'orvatem të zhvilloj një ideal jete vërte shqiptare, bazue mbi prirje të mira qi trashiguem nga të parët. Natyrisht aty prirjet e këqija do t'i stigmatizoj në një mënyrë qi të mbesë e pashlyeshme në trût e...

Një dritore ndriti në shtëpin qi kish mbushë nata me errsinë dhe një zâ grueje kumboi.